

兩
浙
名
賢
錄

兩浙名賢錄卷之三十五目次

清正

宋二

吏部尚書俞若廉烈

刑部尚書趙履常汝談

大理寺少卿徐純中瑄

太常寺少卿朱仲文質

轉運判官康子厚植

父仲穎附

中書舍人莫粹中子純

國子司業陳和仲墳子蒙附

司封郎中史南叔彌鞏

嘉興守陳茂叔頴子瞻附

兵部侍郎章君寶鑑弟鑄子祖邵附

司農卿呂景陽秉南

校書郎方子高山京

太常寺少卿王處一萬

侍御史蔣伯見峴

陳錫嘯元龜

禮部侍郎徐公望儼夫

福建司理毛君玉蘭

秘閣修撰陳子公均

教授徐受之天祐

承宜使趙待用汝擢

監登聞鼓院章升道樵

戶部侍郎商輅仲飛卿

元

監察御史王叔善餘慶

方希元仝翁

明一

刑部主事屠任

御史柴叔貞履

子廷傑附

監察御史王進德敏

吏部員外郎張仲高昇

懷安縣知縣胡孟通節

福建按察使陶屋仲

四川兵備僉事王文璉琦

韶州府知府湛用和體

翰林院侍講王希範洪

王晉叔升

子瑱附

兵部尚書柴叔興車

大理寺卿徐復陽初

饒州府知府葉屢道砥

揚州府知府李貞

應天府府尹陳俊民俊

太常寺正卿姚友直

四川按察司僉事謝惟壽忱

監察御史茅維揚

四川按察司僉事王彥修緒

廣西左布政使胡宗愚智

思南府知府求尚圭琰

按察司照磨張友讓禎遜

江西按察司副使周元靜安

兵部郎中李伯偉山如

子德附

四川按察司僉事高汝璠肆

刑部員外郎徐仲規昂

吏部侍郎范理

山東按察司副使童守正真

山西參政褚克卿讓

廣東左布政使韓伯陽陽

都察院右僉都御史魯希文穆

子崇志附

提學僉事邵德溫玉

子莊附

蘓州府通判陳履信信

吏部尚書魏仲房驥

兄驥子完附

陝西按察使呂好隆昌

吏部左侍郎俞積之山

附子誥

監察御史潘貴模楷

附弟英

刑部主事田廷玉珰

按察司僉事王調之鼎

附子鋌

廣東巡撫李宗楷棠

江浦縣知縣嚴允迪迪

陝西按察司僉事陳永言詠

刑部尚書樊廷璧瑩

廣東叅政胡廷慎謚

附子惠

應天府通判林孟陽春

兩浙名賢錄卷三十五目次終

清正目次

卷之三十五

五

光緒

兩浙名賢錄卷之三十五

東海徐象梅仲和氏謨

淦陽賀應旂士以氏聞

清正

宋二 共二十七人

吏部侍郎俞若晦烈

俞烈字若晦臨安人祖徹與張九成凌景夏齊名烈少
警敏淳熙八年試禮部第一授太學錄遷博士光宗卽
位轉對請酌成平元祐之制日輪講讀官內直以備訪

問進秘書郎出守嘉興上供及額卽止不肯增繕錢以受最賞召爲司封郎尋除中書舍人論駁不撓忤韓侂胄論去嘉定初起知慶元府移鎮江撫輯流移幽盡恩意召權禮部侍郎兼中書舍人不以往事懲於勲戚濫恩貂璫佚罰官掖黃綠干請多格不行尋除吏部侍郎兼侍讀進讀通鑑至唐斜封墨勅又讀孝宗聖政至郊祀不買象事拱而言以致諷戒號盤隱居士有盤隱詩編掖垣制草奏議北征等集

刑部尚書趙屢常汝談

趙汝談字履常太宗八世孫居餘杭登淳熙十一年進士偉趙汝愚定大策汝愚欲驟以詞掖處之力辭去已而汝愚去國與弟汝謙力上疏乞留汝愚斬侂冑聞者吐舌遂罹黨禍被斥依祖墓以居者累年益肆力學問除太社令時侂冑用事熾甚汝談痛憤一日登壇讀祝大呼侂冑及陳自強名自強不能堪它日指汝談曰未座白晢者何人汝談不爲動召試館職補正字是時吳曦叛上下束手或請就以曦爲王其人造汝談汝談詰之曰孰欲王曦者可斬其人面發赤不能對而去出知

嘉興府與郡將王介志合改知無爲軍與光州守柴申
行安豐守陸唆俱稱循吏改湖北提舉常平賑荒盡
知温州改知外宗正作詩勉其族屬皆望風而化寧宗
崩以哀痛得疾賀理宗表力寓勸戒陳碩曰此諫書也
端平更化以禮部郎召兼學士院權直制詞時朝議出
師汝談反覆言不可輕戰而和尤非計旣而三京收復
雖前言用兵不便者亦喜而汝談獨有憂色未旣洛師
敗朝論始服其先見累官給事中權刑部尚書卒汝談
天資絕人沉思高識自少至老無一日去書爲文章有

西漢風篤於倫誼而忘讐怨御史王益祥嘗劾之後汝
談官其鄉益祥媿不敢見汝談乃數過之相得惟甚所
著有易詩書論語孟子周禮禮記荀子莊子通鑑杜詩
註

大理少卿徐純中瑄

徐瑄字純中定之子賀光宗卽位表補將仕郎試中法
科由許事遷朝奉大夫大理少卿會濟邸獄起史彌遠
囑其附會賊殺無辜且啖以美官瑄曰殺人以苟富貴
吾不爲也守正不從遂削官謫道州又徙象州竟死於

貶所。端平改元，侍御史王遂請加褒卹，詔復原官。贈集英殿學士。官其二子，郡立勸忠坊於第左。

太常少卿朱仲文質

朱質，字仲文，義烏人。登紹熙四年進士第二人。廷對，春秋大義以復讐爲說。孝宗聞之大喜，累官著作郎兼侍左郎官。開禧初，金使入見，倨慢，上書乞斬之。虜聞之，縮頸尋擢右正言。左司諫皆兼侍講，時韓侂冑議用兵，質以爲不可及。師出無功，而侂冑更欲議和，質又以爲戰勝而和尤不足恃。況議和於不勝，虜有以玩我矣。侂冑

大怒卽日移太常少卿兼權吏部侍郎嘉定再和遂以
謫去用累赦復官予祠差知道州未及上而卒積階朝
散大夫有易說舉要奏請詩文雜稿

轉運判官康子厚植

父仲頴附

康植字子厚金華人父仲頴仕至尚書吏部郎中植用
世科登嘉定進士授主簿三遷爲武安軍節度掌書記
以需次之暇執經於徐僑之門者三年端平更化侍僑
赴京喬行簡欲處以職事植亟赴書記任置制使史嵩
之團結漁舟防江植持不可嵩之怒對移江陵酒官請

奉祠徑歸。未幾除黑子正。改通直郎。輪對言事。抗直忤
執政意。差通判廣德軍。救荒有法。陞知本軍。以治最聞。
召知大宗正丞。遷兵部郎官。出爲浙西提點刑獄公事。
劾奏平江守臣史宅之治郡無狀。嵩之宅之兄弟也。時
爲丞相。并及之。疏入。理宗震怒。欲重罪之。杜丞相範時
在樞府。爲之極諫。謂憲臣言事既不中。又加之罪。如天
下公議何。理宗尋悟。乃徙宅之隆興。而植提刑福建。改
知寧國府。兼權江南東路提舉茶鹽義倉。奏免和糴行
經界法。除都官郎中。出知吉州。改福建轉運判官。赴闕。

奏事卒於途。歷隋朝奉郎。

中書舍人莫粹中子純

莫子純字粹中山陰人以恩補官銓試及禮部奏名俱第一。賜進士第。簽書平江軍節度判官。聽公事。除秘書省正字。歷遷中書舍人。蘇師旦本平江筆吏。韓侂冑任爲腹心。氣陵薰炙。求進者爭趨其門。一日遇子純於櫺。堂。趨前執禮甚恭。子純不爲禮。師旦已深恨之。會師旦遷官。子純又執不可。侂冑怒。出子純知贛州。加右文殿修撰。改知江州。不赴。又改溫州。提舉太平興國宮。嘉定

人年卒子純性資聰悟傳聞強記立朝之節始終不渝
士論歸之

國子司業陳和仲塤

子蒙附

陳塤字和仲鄞人大叔父平與同郡樓鑰友善死鑰哭
之塤纔四歲出揖如成人鑰指盤中銀杏使屬對塤應
聲曰金桃問何所據以杜詩鸚鵡啄金桃對鑰竦然曰
亡友不死矣以禮部第一登嘉定進士第調黃州教授
喪父毀瘠考古禮行之忽歎曰俗學不足學乃師事楊
簡攻苦食淡晝夜不怠免喪史彌遠當國謂之曰省元

魁數千人狀元魁百人而恩數踰等盡令省元初授堂
除教授當自甥始塤謝曰廟堂之議甚盛自塤始得無
嫌乎徑部注處州教授以去士論高之與郡守高似孫
不合歸奉其母召爲太學錄轉封稱旨遷太學博士改
太常獨爲袁燾謚議餘皆闕筆歎曰幽厲雖百世不改
謚有美惡豈諛墓比哉李全在楚州有異志塤以書告
彌遠痛加警悔以回羣心蚤正典刑以肅權綱大明黜
陟以飭政體不納未幾賈貴妃入內又言乞去君側之
蠱媚以正主德從天下之公論以新庶政彌遠召塤問

曰吾甥殆好名邪。塤曰求士於三代之下惟恐其不好名。力丐去。添差通判嘉興府。彌遠死召爲樞密院編修。官入對首言天下之安危在宰相南渡以來屢失事機。使祖宗之仇不報中原之士不復者宰相非其人也。次言內廷當嚴宦官之禁外廷當嚴臺諫之選於是宦者陳洵陰中之而監察御史主定劾塤出知常州改衛州。時土寇卜日發際坑遵江山縣而東塤獲謀者卽遣人致牛酒諭之曰汝不爲良民而爲劫盜不事耒耜而弄甲兵今享汝牛酒冀汝改業否則殺無赦於是自首者

以百數獻器械者重酬之遂以潰散歷遷浙西提點
刑獄知安吉州俞垓與丞相李宗勉連姻恃勢黷貨垓
親按之弓手戴福以獲潘丙功爲副尉宗勉倚之爲腹
心盜橫貪害埧至福聞風而去貽書宗勉曰埧治福所
以報丞相也傳聞實走丞相所賢輔弼不宜有此宗勉
答書曰福罪貫盈非君不能治宗勉雖不才不敢庇姦
凶惟君留意及獲福皆欲殺之埧曰若是則則濫矣乃
加壘徇於市囚之園土召爲吏部侍郎遷國子司業諸
生相慶得師出知温州未上以言罷埧家居以泉石自

類四方學者踵至、輕財急義、一言之出、終身可復、子家
年十八、上書萬言論國事、吳子良奇之、妻以女、爲太府
寺主簿、入對、極言買似道缺失、爲淮東總領、似道誣以
貪污、貶建昌軍簿、錄其家、惟書置耳、未幾放便、以刑部
侍郎召、不赴、卒

司封郎中史南叔彌鞏

史彌鞏字叔南、彌遠從弟也、好學強記、紹熙四年入太
學、升上舍、時彌遠柄國、寄理不獲、試淹抑十載、嘉定十
年始登進士第、鄂帥李臺知彌鞏持論不阿、辟谷幕府

事尋召戊卒失律欲誅之乃請誅倡者一人軍心咸
服改知溧水縣嘉熙元年都城火彌華應詔上書謂修
省之未至者有五又言濟邸之寃足以干和氣而召災
異蒙蔽把握良有以也出提點江東刑獄歲旱饒信南
康三郡大侵乃釐戶爲五甲乙以等第振粟兩爲自給
下衆而戊濟全活者口一百一十四萬有奇休寧有淮
民三十餘輩搃戈劫財逮捕法重以不傷人論罪彌羣
曰持兵爲盜貸之是滋盜也推情重者戮數人一道以
寧饒州兵籍溢數供億不計請汰冗兵令下管門大譟

乃呼諸校謂曰、汰不當許、自陳敢諍者、斬戚帥頭、請罪、
諸營帖然、廩給亦大省、召爲司封郎中、以兄子嵩之入
相、引嫌丐祠、遂以直文華閣、知婺州、政政里居、絕口不
道時事、卒年八十、真德秀嘗曰、史南叔不登宗衮之門
者三十年、未仕、則爲其寄理、已仕、則爲其排擯、噤然不
語、有如此、

嘉興守陳茂叔頴

子瞻附

陳頴字茂叔、壽昌人、少游太學有聲、登嘉定十年進士
第、宦轍所至、輒以最聞、時相開邊、薦叅謀官、知政事、頴

抗論政府非賞功之地、命遂寢、出守嘉興、以大理卿召、言者阻之、且逮吏、稽在任出納、摘其疵、無所得、私歎服之、復其子疇爲大理評事、會時相以意嫉邊守、下之理、必欲死之、頴謂疇曰、殺人以苟容、如天理何、疇奉法如頴教、竟以忤歸、頴笑曰、是足爲吾子矣、自嘉興歸、關一室、題曰志齋、十五年、竟不復仕、

兵部侍郎章君寶鑑 弟鑄子祖邵附

章鑑字君寶、昌化人、登嘉定癸未進士、調温州永嘉簿、歷官國子司業、兼侍講、進太府卿、以言免歸、端平更化、

首上封事。復召爲講官。兼掌內外制。時相專政。極論其
蠹國。且乞罷職。嘗上疏云。進人不可太銳。聽言不可不
察。又言流民失業。而有司不以告。下情未易通也。除兵
部侍郎。兼給事中。進文華閣待制。積階通奉大夫。爵錢
塘縣開國伯。食邑八百戶。以病丐歸。卒。贈光祿大夫。鑑
天資穎悟。爲文立就。爲人忠直淳厚。事有切於時者。必
爲上精言之。時相疾其正論。每誅以禍福。鑑不爲動。深
爲理宗所知。特見親禮。自號藝翁。弟鏞。登嘉定庚辰進
士。與兄齊名。歷官吏部郎官。子祖邵。官承議郎。知浦江。

嘗捐家帑以全邑民之命至今言其事者爲之感泣

司農卿呂景陽秉南

呂秉南字景陽新昌人紹定中進士尉崇安調寧國法
曹獄無冤滯校勘涇邑版籍別疆理清賦稅公私便之
改吉州法曹數治疑獄有聲遷淮東路檢法官考舉合
格改都昌令盜攻陷州郡秉南據湖死守邑賴以完政
成入與輪對以正君心明道術爲急務語極剴切遷大
理寺丞無何拜司農卿時政歸權臣每除吏必示恩意
秉南屢遷無私謝由是以倣坐免卽日渡江歸所著有

南明稿十二卷

校書郎方子高山京

方山京字子高慈谿人幼孤旅泊外家固窮力學言行修謹景定三年進士第一人或病其制策過簡勉令益數語山京正色曰既徹上覽矣吾誰欺除簽書平江軍節度判官五年秋衡文天府遇堦見山京舉以策士極言內帑之私公田之擾及指擿內庭缺失同事縮頸辭舌請稍諱忌山京披襟當之遂被劾罷歸貧甚無以爲家親故爲築室繼廩山京處之泰然無悶也度宗登極

諱以前官起山京移知建康軍不行尋除秘書省正字
乞官祠進校書郎差主僊都觀得疾遂不起朝野皆惋
惜之

太常少卿王處一萬

王萬字處一浦江人家貧而勵志於學登嘉定十六年
進士第添差通判揚州以母老辭萬少忠抗有大志究
心當世急務極知邊防要害三年授樞密院編修官嘉
熙初兼權屯田郎官輪對稱旨差知台州至郡惟蔬食
布衣終日坐堂皇上事至立斷吏無所售其欺多改業

散去民亦化之不復訟上下肅然丁廉便盡力拯之民無飢死者但言萬名莫不舉手加額曰吾父母也尋乞祠去三年遷屯田員外郎兼編修官轉尚書右郎官尋兼崇政殿說書四年擢監察御史首論刑部尚書史宅之故相之子昔常弄權不當復玷從班上命宰相再三論旨迄不奉詔上不得已出宅之知平江府史嵩之自江上董師入相衆莫敢言萬首論之會議相之事已次疏入除大理少卿萬卽日東還召赴行在奏事出爲屬建提點刑獄加直煥章閣四川宜諭司叅議官皆辟俄

乞休致。特轉朝奉郎守太常少卿致仕。卒年四十八。及
薨之。罷相。人方交論其非。上思。薨先見。謂。薨立朝。蹇諤。
古之遺直。爲郡。庶平。古之遺愛。特贈集英殿修撰。予錢
五千緡。田五百畝。以贍給其家。謚忠惠。

侍御史蔣伯見峴

蔣峴字伯見。奉化人。性剛不阿。慶元二年進士第。授太
常掌故。改武康令。有治聲。調嵊縣。燭幽摘姦民。以爲神
貳薦。拜右諫議大夫。事有不可。必廷辨。面折。端平初。除
殿中侍御史。兼侍講。史嵩之欲開督府。與樞密李宗勉

論不合私請勅之。峴曰：「宗勉無過，臺諫乃耳目官，豈受私請邪？」峴嘗劾鄭良臣，上曰：「良臣，嵩之所舉。」峴對曰：「公論不容臣不知有嵩之也。嵩之後，以書罪蔡範、袁肅等。峴曰：「此有用之才，不可經也。」因自警曰：「勿欺心，勿負主。勿求田，勿闢舍。」號曰：「居士。」官至寶章閣學士卒。

陳錫嘏元龜

陳元龜字錫嘏，平陽人。讀書，迎解落筆輒驚人。以六典貢漕闕，升太學，擢嘉熙進士第，教授瀘州。歷江淮諸州。辟官，開慶初，提轄左帑。時太學六士扣闕，時相怒其攻

已欲去之。將以元龜爲諫官。諷以意。元龜正色曰。臺諫天子之耳目。不可以市私恩。直士國家之元氣。不可以報私憤。學校公論之自出。奈何摧折之乎。遂被劾。未幾。除主管官誥院。委買江東限田。元龜曰。熙寧間。海內無事。王安石以新法騷動。釀成中天不忍言之變。普天之下。莫非王土。未聞瘠子以肥父而家可爲也。因是又劾去。道得疾。及門而卒。自號蒼巖。有蒼巖雜著八十卷。

禮部侍郎徐公望儼夫

徐儼夫字公望。平陽人。高才博學。以文章鳴當世。淳祐

辛丑廷試第一。歷官館閣。以忤丁大全拂衣歸。終其用事。杜門不出家。貧并日而食。日抱膝高吟。聲出金石。或勉其抑已謝過。儼夫笑而不答。景定更化。起爲禮部侍郎。卒。

福州司理毛君玉蘭

毛蘭字君玉。松陽人。資性冲澹。簡默莊重。官福州司理時。宰相趙汝禡之黨曰林晃者。有罪下獄。使人夜懷金私之。蘭正色不受。復賄當道者以威怵之。不動。卒坐晃以法。汝禡聞而歎曰。蘭持法如此。何有於廷尉乎。後召

蘭不果行累官二十載歷敘凡九考居最卒止承直郎
未能脫選時咸以劉向比之

秘閣修撰陳子公均

陳均字子公平陽人歷知東陽麗水西安三縣以最除
大理丞出爲江東提刑改廣東徙寇犯邊漕攝帥幕少
年邀功縱殺囚數十平民於獄均曰治兵帥職獄吾職
也自行審覈盡釋之帥不悅媒孽於臺竟罷去久之起
知贛州兼江西提刑以潔滌汚以慈易暴咸淳初除檢
正會賈似道以平章奉母居湖濱欲以堂印自隨均爭

曰堂印無出城之理由是免官未幾以秘閣修撰樞密都承旨致仕卒年八十一均少受教於真德秀故剛正有守立身行政務盡其職雖屢黜亦不顧也

教授徐受之天祐

徐天祐字受之山陰人以父相恩爲將仕郎銓試詞賦第一尉歸安時年尚少卽以吏事稱嘗出郊吏具供帳甚飾天祐詰所從出吏以例對天祐曰費出於官則犯法於民則重擾例安可用盡却之貴人居邑者將囑事出謂人曰吾見尉自不敢有所請中進士第爲大州教

授日與諸生講經義聽者感發德祐二年以國庫書賸召不赴退歸城南杜門讀書四方學者至越必進謁天祐高冠大帶議論卓卓見者以爲儀刑

承宜使趙待用汝權

趙汝權字待用奉化人。庶謹不苟取官至承宜使嘉泰五年南安西溪洞尹彥輝跳梁汝權挺身諭之彥輝頓首泣謝曰天賜公活我郡賴以平後被命經理斬春事梅節有方雖府庫克實未嘗一開燕瀕行有牙契錢七十緡吏白側當得之。吾不受。教官葉建以母夫人年高

爲勸汝權自指其頰曰鄙陋相豈更望溫飽耶後死無
以爲歛朝廷聞之給喪葬費以表貞白封奉化郡公

監登聞鼓院方升道樵

方樵字升道昌化人嘉定元年進士歷海州高郵山陽
教官習知海微事再上時相書力陳李全必叛劉瑄不
可任重後全作亂郡官多被其害獨樵率諸生盛服坐
堂上賊至斂刃而退後宰吳縣通判常州皆以樵公著
稱以薦召監登聞鼓院尋以疾丐歸卒樵學宗伊洛議
論通暢識達時務所著書有集卷子十八篇章氏家訓

七卷補註春秋繁露十八卷注補古文苑二十卷行於世

戶部侍郎商鞏仲飛卿

商飛卿字鞏仲台州臨海人淳熙初由太學登進士第仕無爲軍教授累官至工部郎官時韓侂胄柄國氣焰薰灼飛卿既至未嘗輒一造請踰月即丐去提舉福建路常平茶鹽事擢監察御史以言事忤侂胄罷爲奉常請外以秘閣修撰爲荆湖南路轉運判官改司農卿總領江東淮西軍馬錢糧金陵故有帥漕治所合戎騎二

師留鑰內侍號六司宴飲餽遺費動萬計飛卿以身率
儉節縮浮苛糧餼時歛散稍稍以裕聞就擢戶部侍郎
侂冑將舉師嘗問餉計豐約飛卿以實告比調遣浩繁
不克支屬有旨俾飛卿軍前傳宣撫勞值金兵大至幾
不免以憂卒家貧不克葬人始服其清

元 共二人

監察御史王叔善餘慶

王餘慶字叔善金華人受業許謙之門嘗游京師有舊
僧官爲統制者勢焰烜赫得其一言官爵可立致或以

其名聞。備召之。拒曰。吾學將以伸吾正道。寧有屈身而
道可伸耶。縉紳悉服其操行。至正初。入經筵爲檢討官。
累拜監察御史。政聲著稱。後使廣東。詢問疾苦。惠政爲
多。

方希玄全翁

方全翁字希玄。鄞人。溫厚誠篤。博學力行。志不仕元。已
而方國珍據有明州。致書以宗人稱。欲強起爲輔。全翁
歷敘世次。由蕭來。不敢附籍。且謂大明真天子出。懇詞
勸之。奉圖歸順。國珍不從。遂與之絕。號遜庵。以自明其

志居鄉以齒德見推。守令至輒賓禮之。事從及門以政事相訪。多所裨益。終身澹泊自守。以壽終。

明一 共五十四人

刑部主事屠任

屠任。嵯人家。貧力學。善詩文。兼精篆隸。洪武間。任蕭縣訓導。遷河南武陵知縣。在任九年。一毫不苟。取有獻瓜菜者。曰。此苞苴之漸也。遂却之。永樂中。遷刑部主事。卒於官。昇輿歸葬。惟篋書束帛而已。

御史柴叔貞發

于廷傑附

柴履半叔貞，鄭人。應洪武二十七年鄉貢，授監察御史，立朝正色，不畏權勢。嘗面折太宰之過，巡按河南時，道經通州，卽發倉以賑民飢，全活者萬計。上怒，謫令交趾尋悟召還，改比京河南道御史，名震京師。會中風卒。子傑，字廷俊，中順天乙卯鄉試，行已端方，計偕上京師。聞舟人夜泣，欲投水死，傑問故，知爲官租所迫，卽捐路資使償之。明年下第歸，復遇前舟人，遂與載夜乃歸。其妻遭譴，傑正色叱去之。授定陶令，值大水蝗災，民輸租不足，嘗道謂其拙於催科，遂下考。法當左遷，以憂去。後

竟不起

監察御史王達德敘

王敘字達德寧海人氣剛不與人款狎讀書至忘寢食
家貧甚或飲食不時則啜菽飲水怡然若飫粱肉人非
其類雖欲飲食之不能也林褥稍溫軟輒弃去獨卧木
榻上曰吾身當適四方甘苦未可知以太學生分教忻
州暇日與邊將習騎射邊將奇其材而苦其介於常所
燕會處密置美姬伺其醉鋪之而去既覺身自破壁取
展馬乘之而還諸將驚謂敘文皇太子一日謂太史

宋濂曰、世道日漓、人其無古若者乎、濂以敏對、太子
動容稱歎曰、何異魯男子也、嘗督運舟川、峽悍急、同行
者多捨舟登陸、敏曰、王事君命也、死生天命也、祇君命
以俟天命、何以陸爲、且舟失累人已、獨安乎、後他舟輓
溺甚衆、陸行者皆獲譴、敏獨不坐、遷監察御史、

吏部員外郎張仲高昇

張昇字仲高、杭州人、弱冠有才識、推擇爲郡吏、卽以清
謹稱、守以下、咸禮遇之、勤視簿書、取嚴一介、諸爲姦利
者、皆敬憚昇、賢聲蔚起、洪武間、謁選、超授吏部員外郎、

清江

卷之三十五

七九

光緒石堂

矢志堅貞終始無玷及卒上察其廉特給驛舟遣內臣送柩還鄉誠異數也祭酒李時勉誌其墓

懷安縣知縣胡孟通節

胡節字孟通慈谿人由順天鄉試舉人授懷安知縣爲一時廉能首稱值外艱歸行李蕭然邑人感泣欲贐金不能強乃建卻金亭於西禪驛之渡口自恨勿克終養廬墓而卒

福建按察使陶垕仲

陶垕仲寧波之鄞人洪武初以國子生擢御史彈擊不

避權勢。上雅愛重之。陞福建按察使。時福建多滯獄。
吏賁緣爲姦。厓仲至治賊吏數十人。盡革其宿弊。又興
學勸士撫卹軍民。俸祿雖厚。自奉極薄。有餘悉以賑貧
者。是時布政使薛大方貪暴自恣。厓仲劾之。大方有詞。
逮厓仲至京。事旣白。大方得罪。詔厓仲還官。閩人迎拜。
爲之語曰。陶令復來。天有眼。薛公不去地。無皮。卒於官。
四川兵備僉事王文璉琦

王琦字文璉。錢塘人。永樂甲午舉於鄉。試禮部乙榜。授
汝州學正。擢河南道監察御史。肅明勤慎。風裁凜然。斷

獄不爲刻削虛心聽理務盡其情所平反死者幾七十人陟山西提學僉事精考校敦行實不徒以文藝取士士習丕丕改觀憂去服闋改四川兵備僉事川故多盜琦威行令明盜賊聞風聲皆歛迹去尋乞致仕歸琦歷官三十年清苦潔白守嚴一介家居貧甚衣食常不給郡守胡濬欲餽之懼其不受列狀於朝有詔賜百金琦固以無功辭竟寒餓以死飯舍不具一時藩臬長倡義卹之始克歛

鄆州府知府湛用和禮

湛禮字用和錢塘人永樂甲申進士授內江縣知縣陞
大理評事再遷至韶州府知府韶歲貢藤而產於南海
禮爲疏於朝得免貢嘗遣隸卒至樂昌督稅法外需求
無已令械繫以來禮下教曰暴橫殃民法之所禁令能
不以府役故屈法貸之其賢可知矣由是府役至縣皆
斂戢不敢肆甲乙爭田禮斷歸乙甲復誣訴藩司知其
僞命禮按致之禮慰遣令去約五日乃來辨析竟亦不
加罪也其寬厚類如此清白自持始終無替及引年歸
貧乏幾不能自存

翰林院侍講王希範洪

王洪字希範，仁和人。舉洪武三十年進士，授行人。陞給事中，以文學遷翰林院檢討，進修撰，預修永樂大典，爲副總裁，進侍講，主考禮闈。時胡文穆秉筆修史，位在洪右，每事輒咨之。及文穆有所請，洪輒不聽。至欲載其家乘瑞應之徵，洪力言：「上前以爲不可，取信天下來世。」胡深怨之。左官禮部主事，無何卒。洪少英雋，有軼才，與解縉、王璉、王偁、王達善，號東南五才子，名重一時。居官耿介，忠亮，文章氣節，表表時輩。仕未通顯而爲時宰所

辨士論惜之史官鄭叔美曰王子才高乎一世而行幾
乎古人特以負氣敢言爲衆所忌時以爲實錄

王晉叔升 子瑱附

王升字晉叔德清人子瑱爲平涼知縣升寄書云本家
德清之役已辦兩圖黃冊里長及歸安甲首皆不投而
辦里長不赴京倉此甚良法也正擬安靖幾時十二月
間本縣又定新市弓馬分管十二都但辦什物勾促車
人至今不得安息所費亦不少也令我老景侵尋倘朝
廷容侍親則上章求歸父子相見以盡餘年若宛轉仕

途則相見無日矣。人說有分俸之例，不審有否。如得分祿以養，亦足爲榮。若彼處關支則不必也。凡事清心潔已，以廉自守，食貧處儉，儒者之常。慎勿以富貴爲念。古人云：貧乏不能存，此是好消息。正當以此言爲受用也。治民以仁慈爲心，報國以忠勤爲本，處已當以廉敬爲業，更須勉力。暇日卽以性理之書及羣經留玩，自然所惡無邪，更須熟讀新律，自然守法不惑。飲酒嘗以康節先生爲範，不可縱恣。忠定之事，律許則行，不可干其紀也。此後倘有的便，可買附子一二枚，川椒一二斤，起稅。

而○來○餘○物○非○所○覩○也○此○書○附○之○御○史○臺○勾○管○字○文○佳○爲○
吏○搜○得○其○書○以○聞○太○祖○嘉○歎○下○詔○褒○美○賚○白○金○百○兩○
絹○十○疋○附○子○五○枚○椒○五○斤○仍○令○有○司○除○本○戶○雜○役○以○旌○
異○之○

兵部尚書柴叔輿車

柴車字叔輿錢塘人爲人清慎有節操永樂間由舉人
再轉至兵部員外郎從文皇帝北征還遷江西參政
時營造事嚴勅車入闕取材道經廣信太守輿車有舊
髹蜜一甕車疑其重發視之皆白金笑曰此所謂故人

知府居不知故人卒拒不納以事左官復入爲職方郎中遷岳州知府勸農視學公暇則周行田野督民耕桑時時進諸生講論德義三年郡內大治復召入爲職方郎中宣德五年擢本部右侍郎已而進左屬西部不靖廷議以車幹敏命協替陝西軍務先是虜寇涼州副總兵劉廣喪師失律蔽不以奏更以捷聞妄要功賞車至發其罪上嘉車忠誠賜金織衣乃逮治廣岷州上官后能家人呂功陞賞車疏罷革在軍中疏凡數十上切中時弊同列咸不喜而車持論益堅於是上察車孤

忠詢國益大賢之遣使宴勞錫賚甚厚進兵部尚書
於京邸賜祭葬給驛以歸其喪

大理鄉徐復陽初

徐初字復陽會稽人自幼務精思力踐之學領鄉薦教
授濬州久之徵爲給事中仁廟改元首疏治道十事

皆見嘉納宣德初漢庶人高煦反勅上親征異贊有

功賜賊獲四人英國公張輔朝會失儀初劾其跋扈無
人臣禮上雖曲宥輔而心嘉其直擢大理鄉持法務

平恕中官阮某守遼東失利按罪當死者三十餘人初

奏詠首惡餘無濫及工部侍郎羅汝敬巡撫陝西坐事黜免遇赦吏部輒復其官言者劾以爲黨罪應死例以是特大覆奏耳吏部因得釋嘗與寺丞楊復論事不合被劾下獄太史奏大理星不見上特復其官星乃見正統初乞歸又十年聞乘輿北狩一時悲憤卒初生平忠誠孝友內外一致而剛廉節槩尤爲縉紳所推

饒州府知府葉履道砥

葉砥字履道蕭山人少有學行洪武初舉進士除定襄縣丞坐累謫涼州日柱門力學處之裕如日吾無媿於

心足矣。更號坦齋。又號尋樂。作賦以見志。士大夫謫居者多宗之。建文元年。詔求賢才。羣臣交薦。召爲翰林院編修。永樂初。坐修史書靖難事。多微詞。被逮。籍其家。惟薄田。樊廬。圖書數篋而已。事白。仍與史職。尋改考功郎中。尚書蹇義任以藻鑑人才。仁廟出東宮。以砥爲侍講。職無弗舉。久之。引年求去。不許。乃自言於吏部曰。砥老矣。猶叨祿在朝。人將謂何。上若不棄。願得一小郡。牧民庶報効萬一。吏部以聞。卽拜饒州知府。饒有磁窰。銅冶。而丁徭復等他郡。砥言於當路。減四之一。諸所利

病悉爲興章刑清訟簡日賦詩自適年八十卒於官士民巷哭罷市著書數十卷孫冕舉進士官至副都御史自有傳

揚州府知府李貞

李貞海寧人洪武中補邑庠生建文元年赴京條具用兵方畧上嘉其忠義光祿司賜燕授湖廣道監察御史未幾靖難兵至歸隱於臨平山中成祖登極謫王田縣爲民宣宗立雅知其名召知揚州府特與勅諭旌其忠直服職三載章累百上民被其澤考績入覲以

疾乞歸謝還勅諭上曰知府俱無勅與爾示子孫及歸家徒壁立持正以終

應天府尹陳俊民俊

陳俊字俊民東陽人登永樂乙未進士除監察御史遷撫南畿劾賊吏革宿弊郡邑肅然累官應天府尹以嚴峻繩下吏有舞文者卽杖殺之處同僚不所以私嘗曰吾不能自立清流然隨波汨泥亦不爲也未幾卒於官貧無以殮士論服其廉

太常卿姚友直

姚友直，蕭山人。洪武中進士，授中書舍人，改翰林侍書。永樂初，新獻王、滕王皆以皇孫年少，未之國。上以爲輔導，宜用正人，拜司經局洗馬，遷左春坊左庶子。仁宗王經居，狀以禮不激，不阿兩府，皆嚴重之。仁宗卽位，滕王始建國雲南。上欲使友直終相王，遂除雲南布政司右叅政，領滕府長史事。宣宗卽位，將郊祀，召爲太常卿。友直歷事四朝，剛介廉慎，以結主知，方期大用，而遽以疾卒。朝野惜之。

四川按察僉事謝惟壽忱

謝忱字惟壽永康人登永樂壬辰進士授監察御史遇事敢言不避權貴九爲巡按諸姦禁暴無所假借人稱謝國玉漢府謀不軌庶得其實以聞命勦之賜反屬男女四人囚忤尚書蹇義陞四川按察司僉事歲歉民多抵法忱聞之爲求可生之途適地方多虎患下教曰有得虎皮三者免一死人爭捕之於是虎患息而民命以全卒於官歸葬之日行李蕭然士民感歎有爲之泣下

監察御史茅律勸惟楊

茅維揚字惟揚慈鄉人齊魯間原有智計登永樂乙未

清直

卷之五十五

二

光緒

進士初拜行在廣西道監察御史臺中奏疏及諸道獻
獄當否皆出裁擇權國用僉事轉河南副使四川按察
使所至皆有廉名歸田之自囊無幾金色人錢源以詩
美之曰山中此日賦歸來共說清風似寇萊四十二年
瘡癥乃曾無寸地起樓臺至今以爲美談

四川按察僉事王彥修緒

王彥修名緒以字行鄞人永樂甲申進士授工料給事中
累上封事多所僉納轉撫安廣西福建兩省鈔強植
勦得勞來安集之驛轉四川按察司僉事使節所臨

豪屏息有爲京朝官者。居家不律。陰持當路短長。莫敢誰何。竟奏置之法。彥修敗歷中外。餘三十年。惟以庶幾自持。身沒家無餘資。長於諷詠。有懶顛集若干卷。

廣西左布政胡宗愚智

胡智字宗愚。會稽人。永樂中舉進士。拜監察御史。掌院顧佐深器之。謂可屬大事。已而出按部。多所平反。中貴人某怙寵觸法。連引齊魯楚蜀數郡。智奉詔往訊。一鞠得其情。擢福建按察司副使。墨吏望風解綬。還廣西按察使。龍州與交趾思郎州連歲交兵爭地。智定以公議。

交人不敢復爭

宣廟特加賞賚進左布政使異政尤

多景泰初乞歸杜門謝客守令鮮窺其面居地苦隘守
欲以閒曠地益之辭不受

思南府知府求尚珪琰

求琰字尚珪新昌人性穎敏好學涉獵經史永樂間以
貢授九江通判在官滿兩考一以公薦自持時勅造廬
山竊出帑金萬餘琰用其半餘悉封還於朝用薦擢貴
州思南府知府清恭愈勵嘗於宅傍種棗一林謂子孫
曰吾以木奴千頭遺汝矣人觀卒於京

福建按察司照磨張友讓禎遜

張禎遜字友讓會稽人性剛正清介公於嫉惡讀書嚴義利之辨嘗曰我私淑孟軻氏人稱爲張孟子永樂中舉賢良方正授福建按察司照磨持已慎密克修其職數與上官辯時政得失言論侃侃不少詭隨上官嫉之不得行其志友讓卽引年返初服欣然着角巾歸一時詞林諸名人競爲詩文以高其行

江西按察副使周元靜安

周安字元靜仁和人永樂中以國子生授刑部主事陞

郎中安精聰識慎刑法既履官郎遷處外舍使志慮清
曠務得獄情以是人樂輸誠徃無冤繫擢江西按察司
副使矢志清白斤斤職守歷官二十餘年家無尺寸之
增士論以爲難

兵部郎中李伯偉山如 子德勝

李山如字伯偉鄞人永樂間以稅戶人才授鴻臚序班
積資陞兵部郎中屢奉使命嘗同石亨紀功大同風禾
壁立忤尚書陳汝言致仕歸後先歷官四十餘年清苦
一節孝友天至非奉母不御酒肉貧寒不改韋布比歸

抱書囊牖同讀之。環堵數椽，躬任井臼之勞。時人稱爲
搗穀郎。中塵生，甌釜糴，不能自給。恩詔歲給月食米
五石，進階朝列大夫。及卒，有司襄葬事。子德，字克明，讀
書能詩文，以市鬻糊口，貧不能具稿。鄉人憐而頌之。

四川按察司僉事高汝暉

高暉，字汝暉，臨海人。永樂甲申進士，累官按察司僉事。
生平潔廉，好義，自爲諸生時，道逢遺金，輒拾置墻隙中。
俟其人還之，未嘗開視也。官四川，民有烏桓需益部者，
訟田繫獄，更數吏不能決。暉至，廉得其實，立爲斷之。後

謝政歸。其人以黃金厰馬爲報。脾悉拒不受。邊夷感其德。爲構卻金亭。以彰其廉。脾未老乞休。野服蔬食。意豁如也。所著有復庵集。讀易口課。藏于家。

刑部員外徐仲規昂

徐昂字仲規。錢塘人。永樂初。由舉人授兵部司務。陞刑部員外郎。昂謹愿。無他技能。獨斤斤以廉隅自守。有武士謝某者。暮夜懷金來饋。昂謝曰。君以暮夜饋金。豈不聞四知可畏乎。堅却之。謝慚退。無何昂致仕。過姑蘇。病卒。貧無以殮。謝聞之。爲具棺。舍道之人謂昂介特。謝生

長者清節高義兩無媿云

吏部侍郎范理

范理天台人進士釋褐知江陵縣事有循良聲時楊文定溥在內閣其子來自石首州縣官饋遺甚勤理獨不爲禮溥聞而異之後庶知其賢卽薦知德安府再擢貴州左布政使或勸理宜致書謝理曰宰相爲朝廷用人非私於理也何謝爲及聞溥卒乃祭而哭之以謝知己說者以爲兩賢理官終吏部侍郎家無半椽寸土之增服食粗糲如貧生人尤以爲難

清正

卷之三十五

生

職

山東按察副使童守正真

童真字守正仁和人永樂中由鄉貢拜監察御史巡按四川忠誠端慤風紀振揚爲政不求近名而孜孜奉公惟知自靖擢山東按察司副使食正三品俸秩既滿待次天官當事者諷求一見真不往又使人至其邸真托疾偃卧不與交一言遂徙官廣東真卽拂衣歸質素卑鮮識者高之

山西叅政褚克卿讓

褚讓字克卿仁和人幼警敏力學登永樂甲申進士授

禮部祠祭司主事。歷吏部文選員外郎。清介特立。遇人
饒道輒厲聲曰。若謂天下無。爾西漢子耶。凡諸權貴。造
請一槩。峻絕。當事者。寔不能平。出爲山西叅政。未幾乞
閑。卒於家。

廣東左布政使韓伯陽

韓陽字伯陽。山陰人。起家鄉貢。司訓。蘇松二郡。教士有
法。轉丹陽教諭。以太常卿姚友直薦。升南京監察御史。
論奏不避權要。嘗劾同官王復。及內官袁誠不軌事。卒
置於法。禮部尚書楊溥薦陽學行可師表一方。乃授湖

廣督學僉事士類向化如吳中時擢江西按察副使慮
囚多所平反以殊績超擢廣東左布政使尋請致仕陽
孝友天至母病躬嘗後洩性剛正疾惡當路有過亦面
斥之不肯一假借卒以此與郡守交惡家居留心著述
有思庵稿二十卷

右僉都御史魯希文穆

于崇志附

魯穆字希文天台人永樂丙戌進士拜福建道監察御
史執法無私時太宗巡幸北京仁宗監國穆屢上
封事以敢言稱陞福建按察司僉事摧抑豪強無所顧

避時楊文敏執政家人有犯者亦不少貸民因目之曰
魯鐵面文敏以爲賢特薦於宣廟召拜都察院右僉
都御史命捕蝗於大名諸郡還京以疾卒遣官諭祭給
傳歸其喪穆爲人剛方廉介始終不渝歷仕中外二十
年被服如寒素卒之日殆無以爲殮同朝鄉士咸賻助
之穆初被薦入院工部尚書吳中見其蕭然助以器用
穆悉却之及卒中復具棺衾歛焉以穆之行可重也子
崇志官南京太僕寺少卿

提學僉事邵德溫玉

子莊附

邵王字德溫鄆人舉宣德十年鄉試授汝州學正秩滿陞南寧及河間府學教授九年最績轉順天府學用薦擢雲南按察司僉事提督學校已乃以足疾納祿而歸王性至孝痛母早喪卽宦轍萬里必將父以養其教士先嚴義利之辨以身爲範在汝州歲飢民多夢死輒捐俸煮粥以活餓者嘗三典文範在山東宿傳舍達夜金來謁者矢天却之在山西懲前事豫作誓神詩以自見比在江西得人尤多而嚴潔之衆始終可對天日嘗有鬻首飾者至其家直可百金妻取而玩之輒謂曰汝次

之乎使婦飾百金爲之夫者難乎其爲庶矣卒以清約終其身子莊舉進士仕終按察副使

蘓州府通判陳履信信

陳信字履信仁和人少以修謹推擇爲吏益務守廉所服食家自給之宣德間以薦擢大理評事改南京西城兵馬副指揮陞蘓州府通判却例獻慎官箴清俸益勵督餉之京部民爭獻白金爲贖信悉拒却事竣乞歸田里道經吳門前之餽金者復來獻信一無所受蘓人杜瓊贈詩云南還依舊一青蠶又却吳民餽贖錢縱使

此生貧到骨，良獨清白與人傳。至今人能繼之。

吏部尚書魏仲房驥 見驥子完州

魏驥字仲房，錢塘人。登永樂三年鄉試，授松江府學訓導。汲汲成就人才，諸生讀書學官，或夜携茶粥勞問，務令以真知實踐爲務。人人皆感激自奮。滿九載，諸生楊珙等詣闕乞留。獻陵監國令還教三年，召修永樂大典。陞太常博士，歷吏部員外郎，進南京太常寺少卿。正統初，陞吏部侍郎。時中官王振怙寵而驕，每出雖部堂卑官亦欲與避驥，遇獨不避。朝士皆吊之。驥曰：「即使我。」

得罪死然能抑權貴植大體亦奚憾也明日振果訴於
上上御便殿召驥入上曰爾有罪知乎驥曰臣竊
祿人得罪天地祖宗朝廷甚多願陛下明正之上
曰此書生談勿言第思昨日曾得罪孰誰否驥曰若昨
日臣嘗遇奄振揖而過未得罪也上曰何不避之驥
慷慨曰臣備位六卿而避奄人臣誠不足惜如朝廷名
器何上曰爾不畏振乎驥曰臣知畏朝廷耳何知畏
振上改容曰爾言是也溫旨諭之尋陞南京吏部
尚書景泰元年年七十七致仕驥嘗至京師大學士陳

循驥所取士也。謁驥曰：先生維位冢宰，未嘗得立朝，願少待。驥曰：君爲輔臣，宜爲天下進賢才，不得私一座主，意稍不悅，循亦媿。其剛方類此。茂陵復位，進榮祿大夫，家居餘二十年，布袍糠食，不別治生，端厚祗慎，簡約。庶靜，顧徑直，好別白。君子小人，權貴多不悅。性好吟咏，矢口適情，不求雕飾，自有雋永味。旣耄，年事其兄騏，愈恭謹。成化間，監察御史梁防疏驥有德有壽，請如漢故事優禮，特遣行人存問，賜羊酒，有司加絮月三石。久之，驥病，遺書子完，勿以墳墓累鄉里。已有司得請，如例葬。

祭完以遺言力辭。驥身不勝衣。言不出口。清德雅望。海內達尊。卒年九十八。謚文靖。兄驥以進士官終刑部主事。時稱聯壁。

陝西按察使呂好隆昌

子議附

呂昌字好隆。新昌人。舉進士。授御史。屢言時政得失。監收京倉糧。剔剋蝨。耗民皆便之。遷福建按察司僉事。事有切於軍民者。銳志勇爲。大盜嘯聚山谷間。昌率兵深入。反覆開諭。皆感服散去。遷江西按察副使。聽訟明決。臨川令嘗被誣。昌爲白之。聞以私憤來謝。昌拒之曰。汝

以我執法爲徇情邪。其人燒去中貴。棄鎮守樓。甚其叔
白日殺人市中。昌捕得。諡死。會淮邸責民子錢甚急。昌
視其券。久入息多者。卽焚之。棄乃謾語激怒王。王疏奏
昌。併宗室事下御史。御史素賢昌。抗章訟之事。乃由
遷陝西按察使。值邊備方亟。民困供輸。昌屢疏便宜。十
餘事。上悉嘉納。陝爲漢唐故都。其謠俗喜伉壯。巨族
司千戶。背雄一方。怙勢殺人。昌至。聲寃者數十百人。司
惟要當路。以書抵昌。昌按其事。有驗。卽上狀。逮繫。斃之。
獄中。於是直聲震天下。然還廼不徙者數年。疾且革。乃

召其子議議至而冒卒。既無遺金，僚家將以公錢贖。忽見夢於議，呼而語之曰：「若父爲吏三十年，未嘗私一錢。乃今欲以遺骨爲利邪？」議覺而痛泣。旦日，卽奉櫬行。所著有耻齋集。

吏部左侍郎俞積之山

子諱附

俞山，字積之，秀水人。領永樂癸卯鄉薦。以祖母年高，不忍遠違。宣德庚戌，復會試中。教官選，或沮之。山曰：「吾親老，需祿養。秩崇卑，非所計也。」授崑山訓導。歷郕府伴讀。正統己巳，以藩邸舊學擢鴻臚少卿，進吏部左侍郎，佐

銓一以古道自處凡所薦擢不求人知有請謁者輒正色拒之子弟乘間問其故山曰用賢朝廷事而可市私恩邪臺諫有持正者以言事取疾於權倖山爲曲折調護後相繼顯用景泰初議迎復之禮同列頗有難者山獨奮曰鑒興復然後人心悅而天下安況天倫所係之至重邪極力爭之事乃克濟朝廷知山清慎賞賚有加且作歲寒圖題詩贈之以寓褒美之意有以易儲請者山密諫不聽退而憂曰禍機自此始矣乃引疾求歸進太子少傅囊橐蕭然家居日用至假貸以給爲文據經

史詩歌清麗典則善大篆工墨梅而常晦其迹所著有
梅庄集子誥歷工科給事中終建康府知府

監察御史潘貴模楷

從弟英附

潘楷字貴模餘姚人正統初舉明經除仁和訓導樞監
察御史坐劾逆豎王振左遷通州學正振敗復召爲御
史氣節益勵尋致仕南歸落魄無業卽飢寒迫身演死
未嘗少挫其節從弟英字時彥以進士拜南臺御史與
同官范霖楊永劾奏都御史周銓銓自經嘗路者坐英
等以死范楊二御史曰事本霖永無與英英爭曰英實

同。解。義。不。獨。生。會。有。訟。其。事。者。得。減。死。戍。邊。而。英。戍。邊。
陽。景。泰。元。年。詔。復。英。等。官。而。英。已。死。世。咸。惜。之。

刑部主事田廷玉瑑

田。瑑。字。廷。玉。奉。化。人。自。少。警。敏。家。貧。力。學。正。統。八。年。進。
士。授。刑。部。主。事。持。法。不。阿。門。無。私。謁。推。謙。詳。明。而。濟。之。
以。愬。所。案。無。冤。者。尚。書。魏。淵。多。其。才。每。遇。疑。事。必。以。委。
瑑。瑑。盡。心。訊。鞫。以。勤。勞。致。疾。疾。且。革。有。指。揮。坐。重。律。以。
白。金。五。百。兩。贖。之。求。予。輕。比。瑑。閉。門。不。納。曰。吾。病。且。死。
得。無。媿。於。心。足。矣。忍。以。五。百。金。虧。平。生。乎。無。何。竟。卒。家。

無一錢之畜。自司寇而下。同官與素所交游者。皆致賄。始克棺斂焉。

按察僉事王調之。典子鑑所

王鼎字調之。南京工部尚書來之弟也。正統中舉明經。授本縣儒學訓導。以薦陞監察御史。執法堅正。不爲權貴所撓。巡按山西。有知縣郭某者。貪而善賂。鼎頻行當路交口薦郭。鼎固心異焉。及臨縣郭倍道遠迎。承奉周至。愈益疑之。因捕發其奸。罷其官。民歡呼動地。代還陞江西按察司僉事。鼎廉名素著。下車之日。駐吏聞風解。

續未幾以憂去。服闋改廣東時流賊剽掠四境驟然興歸其妻子期以盡瘁國事涉險阻觸瘴厲一不避所得俸資節口自食而以其餘繕治器械一日出巡爲賊所得昇至寨中時有二王僉事一爲吳人頗貪而多義賊誤喜以爲可以媒貨其中一人識之曰此浙江王僉事清官也不可犯遂輿送二十里拜謝而去賊既平兩以年老乞歸都御史韓雍時鎮兩廣素知陶應出白金百兩爲贖陶固辭不獲比至中途因僉事張瓚反之封議如故雍爲之歎息仲子鏊登進士官大理副善於辨論

情早世

廣西巡撫李宗棠

李宗棠字宗楷，籍雲人。登宣德庚戌進士第，授刑部主事。歷郎中，勤慎廉明，獄無留滯。秩滿當遷，樞閣王振怒其不附已，深抑之。成詼棠謁振以謝，棠拂然曰：「官可不做，名節不可壞。」卒不往。振死，超遷本部右侍郎，巡撫廣右。威惠並著，徭人畏服。土官貴琰殺嫡自立，棠與總兵武毅收琰置獄論死。時憲廟在東宮，景泰帝欲易之。立己子琬，希旨建言，羣臣與者各遷美職。陞琰都督，殺

以事降謫，棠遂致仕歸。初，棠過梅嶺時，誓不將一物過嶺。比南歸，閱衣篋中，香草一束，笑曰：「此非廣中物邪？」取投水中，惟自携一杖，曰：「此吾左右手也。」留之歸，老菊莊，絕迹城市。天順十四年二月卒。遣官諭祭，命有司治葬，誥清敏。

江浦縣知縣嚴允迪題

嚴迪字允迪，餘姚人。漢子陵四十五世孫也。通易春秋，二經，補邑博士弟子員，貢入太學，屢試首六館之士。宣德五年，出知江浦。江浦通留都，號難治。迪一以長者化。

導之比屋欣戴在任九年以最聞時執政者素知迪於
成均奏迪爲可大用已得旨矣會宜廟升遐都覆
迷寢正統初入覲懇疏乞歸竟得以前旨晉大理寺少
卿致仕迪歸囊惟圖書數卷而已家仍茅茨不蔽風雨
妻子恒有飢色論者謂不媿高賢之裔

陝西按察僉事陳永言詠

陳詠字永言餘姚人幼從父戍於居庸正統間第進士
拜南臺御史敢言不爲身計時英廟北狩邸王監
國進中興十四事尤指切將臣失事誤國者願甘心以

謝天下又抗言亡徙長陵衛卒徙卽有變以故得不徙
靖遠伯王驥有寵而專詠劾解其兵柄師討鄧茂七之
黨勅詠監軍無一卒犯令者寇平降璽書旌之出爲陝
西按察司僉事母疾嘗棄母死詠亦以哀毀卒年纔三
十有六囊無一錢同官棺歛之耿清惠九疇歸其喪薦
紳道真者相望王尚書竑祭詠而亡其楮竑曰可無用
也公生平不取一錢死安受此楮爲其信重於名卿太
夫如此

刑部尚書樊廷璧瑩

樊瑩字廷璧常山人天順八年進士爲御史巡兩淮豪
有力者憚瑩清介莫敢撓阻條上清軍事宜行之著令
又巡雲南交人誘邊氓盜掠殺吏民方議用兵瑩移論
禍福交人畏御史清梗皆納款出知松江府府富膳瑩
布衣蔬食孚於士民再知平陽以薦陞河南按察使未
幾尹應天陞南工部侍郎改都御史巡撫湖廣計擒錦
田賊酋解散其黨奏省諸藩王營造費金凡百萬計以
疾致仕薦起撫治鄖陽鄖襄流冗安輯召爲南刑部侍
郎雲南晝晦五日勅瑩考察雲貴諸吏罷遣千餘人召

遷部爲尚書十八年致仕正德三年逆瑾誣其妄理陞
議侯事及擅減上供布帛收贖奪其官比瑾誅臺已卒三
年詔復原官贈太子少保謚清簡堂甥習法今潔已好
修侃侃自樹交游稀寡人皆敬而畏之

廣東奉政胡廷慎謚

子惠附

胡謚字廷慎會稽人景泰間鄉試第一登進士歷山西
提學僉事第士等如別黑白士類頗興毀諸淫祠增祀
周唐義氏和氏以下十餘人遷副使風采益振郡民李
鐸聚衆爲亂計擒之調河南建大梁書院祀漁溪以下

十人尋擢廣東參政而卒。謚爲人頴敏嗜學。動必師古。歷官三十年。室如懸磬。怡然自若。人稱爲真儒。其子惠亦舉進士。登仕十五年。兩丁父母憂。哀毀逾制。終刑部主事。孝友。廉介。克世其家。

應天府通判林孟陽春

林春字孟陽。其先台之寧海人。洪武初以戎事遷居金陵。又遷山西太原右護衛。父本榮。又遷代州。至春。又遷萬全都司龍門守禦所。至宣府。乃定居焉。春生於太原。性資穎異。有志於學。比至宣府時。輒肄儒誦。請居於是。

者衆春牲從之資其講益入萬全都司爲弟子員以前
書領景泰庚午順天鄉薦會試中副榜嘗得校官不受
入太學益博覽羣籍工古文辭從翰林學士呂文懿原
卒業期必中進士而竟不成待次吏部僅授應天府通
判專理馬政以清節自厲攻駒考牧恪盡乃心公平不
苛民受其惠無敢干以私者每行縣較閱止食公廩一
毫不取於民蒔蔬公廨隙地至則摘以自給或有笑其
迂者春日我儒者誠迂若楊伯起則古之迂者也我願
學焉未幾以中暑卒年六十有一春爲人外雖和易而

內資剛毅處兄弟篤於友愛性酷好書每暇輒磨墨伸
紙揮汗呵凍寒暑不少廢筆法清勁道麗得者皆珍襲
之居官草草愛民廉潔之操乃其素志不以始終有變
故其卒也貧無以爲歛哀積衆賻僅克歸其喪云

兩浙名賢錄卷之三十五終